



GIUSEPPE CABIZZOSU

BIBLIOTECA

www.giuseppecabizzosu.it

Agniru Canu

(Sassari 1878 - 1966)

Poesie scelte in lingua sarda

Indice

Cenni biografici	5
Trè pasthèri i lu balchòni	6
Pascha d'amòri	7
Dézi o dòdizi figlióri	8
Cussì, óggi, dizìa...	9

Cenni biografici

Pseudonimo di Salvator Ruju. Laureato in giurisprudenza a Sassari nel 1901 e successivamente in Lettere nell'università di Catania, fu critico letterario finissimo. Professore nell'Istituto Tecnico di Sassari dedicò all'insegnamento tutta la sua esistenza. Autore di numerose pubblicazioni fu particolarmente apprezzato per le sue poesie in dialetto sassarese.

Trè pasthèri i lu balchòni

Cand'ancóra mi nigabi
la tó risa diricada,
m'incantaba figgiurendi
li fiòri i lu balchòni.

Lu giraniu éra ròsa
cu li ratti ricamadi,
lu garóvoru in curòri
di curaddu vibu vibu.

Sèmpr'affaccu lu tó balchu,
biancu più di lu gialminu,
a la lùzi di la luna
mi paria fattu di prata.

Calchi vóltha t'acciarabi,
fiòri in mézu a li fiòri;
una ròsa, e chi profumu,
canta duzzura i lu córi!

Pascha d'amòri

Chi profumi di fiòri,
canti disìzi i lu còri!
Giunti sò li rissignóri
a la Pascha di l'amòri.

T'aggiu i li zerchi acciappada,
e abà più nò ti lassu,
e ti sigu a passu a passu
darédd'a l'Addulurada.

Nò ni possu abé d'assentu,
senza tè vibu in affannu.
Vèni vèni. . . Cant'è mannu
chisthu bè chi pa tè sentu!

Lassa i la pruzissioni
a mamma tóia arrasendi.
Candu lu Cristhu è passendi
cresci la mé passìoni.

Li tó basgi, chi piazeri!
Nudda v'è cussì lichittu,
canti vólthi t'aggiu dittu
chi sò dòzzi che lu méri!

Chi profumi di fiòri!
Canti disìzi i lu còri!
Giunti sò li rissignóri
a la Pascha di l'amòri.

Dézi o dòdizi figlióri

Fabiddendi cu li macchi
si cridia Brótu Migheri.
Dittu m'â: – Piglia muglieri,
passa un mesi e ti n'isthracchi.

Vai, Rusina mé, divviru
si mi ni sòggu isthraccadu,
e di tèmpu n'è passadu
da la nótti di l'affidu.

Nò cridia nò lu mé córi
d'assé mai tantu firizzi.
Chi carigni, chi disìzi
candu sèmu sóri sóri!

La campagna è un incantu
di duzzura e gudimentu.
Dì nò possu lu ghi sentu
candu intèndu lu tó cantu.

Ti vò bè finza lu sòri
chi ti tocca e t'abbaida;
nò v'è nudda nò i la vida
dòzzi cumènt'e l'amòri.

Una còsa sóru brama
pa isthà bè abà lu córi:
dézi o dòdizi figlióri,
alligria di babbu e mamma.

E vidèlli immannità
in campagna, forthi e bòni
a trattà piccu e picconi
e lu ganzu d'ispurghà.

Noi nò sèmu nò rurari
chi trabagliani... in ziddai,
e a vidèlli sò a dimmai
pa li vigni e l'aribari!

Nò l'intèndi? – Ahi chi bè
chi si vibi all'aria abértha!
E di e nótti sèmpri in féstha
in triatu e i lu caffè!

Cussì, óggi, dizìa...

Cussì óggi dizìa:

– Tutti li còsi bèddi

sò miràguri di Déiu:

la luna cu lu sòri,

l'isthèlli di lu zéru, li fiòri,

e li profumi suabi. . .

È véru, ma di tutti li miràguri

l'amòri è lu più bèddu,

è lu matessi Déiu.

Cussì óggi dizìa

ischulthendi lu mé córi.

E l'incantu, lu miràguru,

Rusì, l'ài fattu tu.

©2026 Agriru Canu